

Ergo etiam atque etiam rogatus opem mihi fer, Vir illustris. Data venia, indicabo singillatim quibus opus erit. Interim facile judicans, incipientibus nulla non re opus esse, & optime judicans, quid solo Hafniensi convenire possit, et collato Goettingensis horti Catalogo judicans, quid inde possim expectare, quid non possim, mitte mihi, quaeso, plantarum semina quae praesto erunt, quo primum poterit fieri modo.

Sumtus qui ingrediuntur, mittam, quamprimum indicatum fuerit. Officia amoebae praestabuntur quavis data occasione, animo paratissimo.

Succedente tempore & commercio nostro literario, si sperare hunc honorem & hoc gaudium licet, dispiciemus quo modo non solum semina sed & integrae plantae, quae poterunt concedi, transportari Hafniam possint.

Serius ad hoc negotium, quod accepturus sim, admissus, video, cum jam multum annus processerit, grave initium, ut est omne initium, habiturum etiam ob hanc causam tanto lentiores successus. Sed spero etiam sic non defore conatibus meis successus aliquos, qui non effugiant certe aequorum iudicum oculos.

Spero mature his literis responsum, & responsum utique favens, si Tibi me probaro artis & in arte tui similium virorum amatorem & cultorem.

Vir Illustris,

Tibi ad reverentiam dignis obsequiis
comprobandum paratissimus,

Hafniae, a. d. 8. Apr. 1752.

Georgius Christianus Oeder

addo epigraphen literarum ad me dandarum:
à Oeder, Docteur en Medecine, & Correspondent
de l'academie roiale des Sciences de Gottingen,

à

Copenhague

à Monsieur Monsieur Linnaeus, Archiater, & Professeur
en Medecine à Upsal